

vel nullo modo omnino, vel non nisi cum manifesto vitæ discrimine auferri potest, itaque eo apparente triennio opus non est ad discernendum, an sit illud impedimentum amovibile.

4 Porro Spadones hic accipio pro iis, qui altera tantum teste carent, & id quidem non ex Natura, sed ex accidenti patiuntur, nempe quia alter Testiculorum illis excisus est, tales autem neque ad coeundum, neque ad generandum esse impotentes manifestum est, quia & in erectione, & in feminis productione, & concoctione, & emissione non magis deficiunt, quam ceteri, qui ambobus donantur, virtus enim unitur in his; & ita consultus respondit ex Medicis Nancel. lib. 7. *Analog. Microc. ad Macroc. par. 2.* & sequitur Fortunat. Fidel. lib. 3. *de Relat. Med. cap. 2.* & ex luteconsultis allegati per Sanchez *de Matrim. lib. 7. disput. 92. num. 14.* & per Barbof. *in collecti. Doctor. lib. 4. tit. 6. 15. c. 2. num. 4.* itaque allegantes hoc impedimentum tam in coeundi, quam in generandi potentia, non audiendi, tanquam si nihil ad rem faciens allegaverint, nisi testis relictus parvus, & deficiens sit, & in summa ea vitia fortiatur, quæ etiam ambobus communia esse iam supra diximus, & ex quibus interdum coitum, interdum generationem, interdum utrumque simul impediri docuimus. Sed advertendam, posse quoque inter Spadones quosdam connumerari, quibus ambo quidem testes deficiunt, quia excisi sunt, sed illis in excisione relicta est superior pars alterius, vel amborum testium: hos enim generare posse alias dixi ex Hollerio *comm. 5. Aphor. 63.* licet hoc mihi non adeo persuasum sit. Sed etiam veritatem habeat Hollerii sententia, & experientia respondeat, non esset tamen rejiciendus allegans hoc impedimentum coeundi, seu generandi, quia haberet suam intentionem fundatam ex apparenti testium amborum defectu, quod amplia in allegante non totalem carentiam, sed testium exilitatem, aut non naturalem suam, aut aliud quodcunque magnum vitium apparet.

9. Licet ergo quilibet præsumatur habilis ad coeundum, immo etiam unusquisque præsumatur habilis ad generandum, nisi probetur inhabilis, ut per Alciat. *de præsumpt. reg. 1. præsumpt. 4. 1. num. 1.* quia quilibet præsumendus sanus potius, quam infirmus. Rota apud Farinat. *decis. 71. 3. num. 2. par. 2. Tom. 2.* impotens autem seu ad coitum, seu ad generationem, sanus dici non potest, tamen hæc præsumptio in continenti cessaret in eo, qui non haberet testes, quia probatio impotentia in continenti fieri potest, amplia & in eo, qui haberet testes maxime exiles, vel situm naturalem non servantes. incumberet ergo onus probandi ipsimet, se esse potentem ad utrumque, quod licet esset admodum difficilis probationis, tamen ex præsentium Medicorum judicio veritas aliquo modo innotescere posset: nam si facile prospicerent, an illa superior Testiculorum pars, nempe venæ parastata, seu glandula, ubi se dilatare incipiunt, & ad testes feruntur, in excisione testium illis relicta sint. & tamen hoc etiam probato, vix probatum crediderim, illos coire, & generare posse, nisi simul probaretur, eos semen ferre, atque illud qualitate, & quantitate laudabile, & prolificum, tunc enim in his haberet locum, quod nonnulli tradiderunt; Eunuchos nempe, qui seminare possunt, aptos esse ad matrimonium, quod

dictum de his absque dubio intelligi posset, licet illud tanquam impossibile, & veritati contrarium admittetur, & reprobet Sanchez *ubi supra, num. 18.*

De Eunuchis communissima opinio est, neque a quoquam, quod sciam, controversa, quod ad generationem sint omnino inhabiles, unde prohibentur matrimonium contrahere, licet aliquando coeant, & humiditatem quamdam in coitu excernant, ut alias dixi, & notat etiam ex Canonistis Sanchez *ubi supra, num. 17.* Licet Navarra *lib. 4. Conf. 3. tit. de frig. & malef. num. 11.* velit, Eunuchos arrigentes, & copulam exercentes, posse contrahere matrimonium, ex eo quod per eam humiditatem, quam effundere dixi, habeant concupiscentia remedium, an vero hoc satis sit ad matrimonii validitatem, Canonistis decidendum relinquam. Ego ad pensum meum rediens, voco hic Eunuchos eos proprie, qui utroque teste carent, sive id à Natura patiantur, sive arte excisi sint. Quod vero Navarra *ubi supra*, conetur probare, quod vir ille, de quo agit, carens utroque teste potuerit generare, licet ego pro impossibili non ducam, quia possent testes intus manere absconditi, tamen apud me maxime ardua opinio est, & præcipue in eo casu, in quo vir ille habebat quoque virgam exitem, manifestissimum argumentum defectus ipsius Naturæ, quæ neque testes procreare poterat.

Sed præter superiores connumerantur etiam inter Eunuchos illi, quibus testes attriti, aut contusi sunt, ita ut vel emaruerint, vel contabuerint, & tanquam emortua membra propendeant, sintque exiles, & frigidæ, & nulli usui amplius apti. hos Thibias, & Thalias aliis nominari dixi, & de his Joan. Calvin. *in lexico, verbo Thlasie* dicebat, quod possint vitio sublato generare, quam ego opinionem inibi erroris notavi, quod impossibile videatur, contusos, & jam tabescentes Testiculos, rursus reviviscere, & pristinum vigorem recuperare. illud in Ioannis Calvinii tutelam adduci poterat, quod intellexerit de illis, quibus neque bene, neque universim contusi, seu attriti fuerint, ut facile in hac operatione, etiam si arte fiat, evenire potest, sed illis præcipue parastata integræ remanserint, & sola testium substantia contusa contabuerit; vigore enim dictarum glandularum possent hi fortasse generare, sed vitium nunquam tolleretur. Non connumeraverim tamen inter Eunuchos eos, qui etiam testes habeant, ob Naturæ tamen impotentiam semen non generant, neque ob id erigunt, quod tamen fecit Mercat. *lib. 3. de morb. mul. cap. 5.* quamquam Hippocratis auctoritate suum dictum roborat, qui Scytharum plurimos Eunuchos nasci retulit, ut alias dixi; sed Hippocr. vocat eos Eunuchos ab effectu, quia tanquam Eunuchi ad venerea non sufficiunt. hos ergo potius inter frigidos rejicerem, nam & ipsos, Scythas potius frigidos, quam Eunuchos esse Hipp. ipse annuit, eodem Mercato teste ibidem.

Neque etiam proprie Eunuchos esse dixerim eos, qui testes adeo exiguos habent, ut cicicis, seu fabæ magnitudinem non æquent, ut Hostien. *in rubr. de frig. & malef. in summa lib. 4.* ex quo inter nostros Fortunat. Fidel. *lib. 3. Relat. cap. 2.* de quodam narrat: nam & hos, si veneri non sufficiant, potius frigidos, quam Eunuchos dixerim, sed hæc nullius pæne momenti sunt, cum de nominibus quæstio sit.

Tituli Primi Finis.

P A V -

PAVLI ZACCHIAE
Medici Romani,
QUESTIONVM
MEDICO-LEGALIVM

LIBRI TERTII
TITVLVS SECVNDVS

De Morborum Simulatione,
Continens Quæstiones decem;

- quarum
- I. Qui morbi ut plurimum simulari soleant, qui item facilius, qui difficilius simulari possint. Pag. 151
 - II. Quæ ratione deprehendantur qui morbum simulant. 152
 - III. De simulata febre, effectisque ulceribus. 154
 - IV. De simulato dolore. 156
 - V. De simulata insania. 160
 - VI. De simulato morbo cum defectu Animi, & sensus amissione, ut Syncopi, Apoplexia, Epilepsia, Ecstasi, & aliis. 162
 - VII. De simulata virginitate. 163
 - VIII. De simulata prægnantia, & de partu supposito. 164
 - IX. Mulierem peperisse, aut abortum fecisse, ex quibus conjici possit. 167
 - X. De morbis dissimulantibus. 169

ij. N 3

Admo-